

道士黎元興四卷注義太原少尹王光庭作英
 二道士張惠超作志玄藝法師四卷道義
 郡道士任太古注二道士冲虛先生殿中監
 申甫五卷岷山道士張君相作集解道士成
 玄英六卷漢州刺史王真上下二卷義道
 士符少明作道玄宗皇帝所注道德上下
 二卷六卷即今所廣疏矣所釋之理諸家不
 同或深了重玄不滯空有或爾推因果偏執
 三生或引合儒宗或趣歸空寂莫不並深驪
 室競擷珠璣俱陟鍾山爭窺瑤瑤連城在握
 照乘盈懷敷引則光榮縹緲演暢則彩文編
 簡語內修則八瓊玉雪零霽於丹田九轉琅
 膏晶爇於絳闕盡六氣迴環之妙臻五靈夾
 輔之功忘之於心息之於踵得無所得而了
 達化元矣語品證也則擺落細塵超登上秩
 遊八外而放曠指三境而躋昇蹈太一之位
 矣而惣內外之要兼人天之能者未有其倫
 我開元至道昭肅考皇帝降神龍變接統象
 先載內難以乘乾宮中興而御極無為在宥
 四十五年汾水襄城靡勞輟迹具茨大隗自

得朋遊靡八溟為仁壽之庭普萬寓為華胥
 之國至道至德超哉明哉欽若尊經本朝家
 教象繫不足以擬議風雅不足以指陳橫亘
 古今獨立宇宙雖諸家染翰未窮衆妙之門
 多士研精莫造重玄之境凝旒多暇屬想有
 歸躬注八十一章製疏六卷內則修身之本
 囊括無遺外即理國之方洪纖畢舉宸藻遐
 布奪五雲之華天光煥臨增兩曜之色固可
 以季仲十翼輝映二南若親稟於玄元信躬
 傳於太上冠九流而首出垂萬古而不刊則
 大風朱鷹之誦誠難接武典論金樓之作詎
 可同年但以疏註之中引經合義周書魯史
 互有發明四始漆園或申屬類後學披卷多
 著本源輒採撫衆書研尋篇軸隨有比況咸
 得備書纂成廣聖義三十卷大明在上而燭
 火不休巨澤溥天而灌溉不息誠不知量粗
 備闕文天復元年龍集辛酉九月十六日甲
 子序

道德真經廣聖義卷之一
 唐廣成先生杜光庭述
 叙經大意解疏序引
 將釋此經大分二段先明製疏後解正文今
 初述製疏之由者我大唐玄宗皇帝垂衣之
 暇鍾想妙門以大道為天地原根老君乃玄
 元聖祖二經敷演綿歷歲年說自舜朝傳於
 周代詮註疏解六十餘家言理國則嚴氏河
 公楊籙自得述修身則松靈想爾逸軌難追
 其間梁武簡文僧肇羅什臧陶顧孟霞舉於
 南朝任黎二張星羅於西蜀其餘祖述互有
 否臧未盡發揮執窺堂奧以開元十一年躬
 為註解下詔曰在昔元聖強著玄言
 義云詔者勅命之書也在天子為詔為誥
 為勅為制在皇后太子諸王為教為令皆
 君命於臣上命於下之詞也曰者字林云
 曰者從口出言為曰亦云張口吐舌為曰
 說文云曰詞也從口乙聲象口出氣有聲
 而成言詞也故云曰昔者往也在者存也
 元者始也聖者靈通之德也書曰睿作聖

是也強者力取也著者述作也古者深妙也言者詞也謂老君為道化之宗元弘睿聖之至德闡微妙無名之道為強名演暢之詞將以恢振玄風化導於代理深義奧故謂古言居萬聖之先故謂元聖矣

詔曰權與真宗

義云權與始也真者純正不雜也宗尊也

詔曰啓迪來裔

義云啓開也迪進也通達也來謂將來也裔嗣續也邊也謂此道德二篇垂於萬代

傳範後王廣化人天永敷秘妙也

詔曰遺文識在精義頗乖

義云遺留也謂老君玄化既畢上登九清所著真經遺留於代百王所仰萬古常存誠信也信為不刊之典也精者純粹深奧

也義者經之文理也頗甚也乖爽也謂此經玄奧精純之理世所未窮雖百家詮註高甚乖爽謂下句也

詔曰撮其指歸雖屬嚴而猶病

義云撮者採結之謂也指者趨向也歸者

義理會聚也蜀嚴者仙人嚴君平居於蜀肆作道德指歸一十四卷恢廓浩瀚為時所稱蜀都楊子雲昌言於漢朝曰蜀嚴道德沈冥言其識量深厚玄德隱微非常俗之所知而猶病耳當時以為道德之說文

止五千指歸之多將及數萬演之於世謂為富贍廣博議之於理傷於蔓衍繁豐故云雖蜀嚴而猶病也

詔曰摘其章句自河公而或略

義云摘者採擷分判也章者截斷音句也

句者言之所絕也自從也河公者河上公也太極葛玄仙公道德經序訣云河上公者莫知其姓名也漢孝文帝時結草為

菴于河之濱常讀老子道德經即今陝州黃河之側有河上公廟路左有漢文帝望

仙臺存焉時人不知公之姓名常見織履為業居於河上故號河上公爾或略者聖

旨以為道德導經并包萬法圍制三才理圖理家之宗修身修道之要無所不攝無

所不周而河上公分為八十一章局於九

九之數有失大聖無為廣大之趣故云自河公而或略也

詔曰其餘浸微固不足數

義云其餘者言自蜀嚴河公之外五十餘家註義也浸遠也微細也數計也嚴雖猶

病可以議於重玄河雖或略亦足明其至妙自外諸家浸遠微細不足比方固非聖旨之所計數也

詔曰則我玄元妙育豈其將墜

義云我者皇帝自謂也玄元妙育謂二經玄妙之旨也聖旨歎道德隱奧之文上下

玄妙之趣未有了達解釋之人自蜀嚴河公之後注疏者去聖逾遠述道益疎豈可

墜廢隱絕而不弘暢於代矣

詔曰朕誠寡薄常感斯文稟承有後之慶恐失無為之理

義云朕我也古人相謂皆呼人曰仰稱己為朕莊子云雲將鴻蒙皆自稱朕是也自秦始皇刑法以天子一人自稱曰朕其餘

臣庶不得復僭而稱焉寡者道未廣也薄

者德未豐也聖自謙之詞也每仰感此經恐玄理抑絕不得人皆開悟而我紹聖祖之玄廡居萬寓之至尊安可使無為之文壅而不流道德之訓晦而不顯也有後者謂老君垂裕光啓聖唐是也且夫弓冶之子尚不失於箕裘折薪之家或慮曠于負荷沉瘡德光於堯禹聖文邁於古先固當潤色玄玄之功使炳煥于千古也

詔曰每因清宴輒扣玄關隨意所得遂爲箋註宜成一家之說但備遺闕之文

義云聖旨以萬機之暇深入玄關扣寂求音探真達妙以契合希微之理聖文釋沖寂之文得自神襟諸於祖訓矣表也解也註釋也尚以謙德不欲同呂氏丘明自爲一家之述作但備衆人所註解未了之義爾

詔曰今茲絕筆是詢于衆公卿臣庶道釋二門

義云絕筆者經理既暢製述已周釋筆罷書是謂絕筆如昔仲尼自衛反魯因魯史

而修春秋自隱公訖哀公一十二公二百四十二年獲貶行事至哀公十四年戊午春西狩於大野叔孫氏之車子鉏商獲麟以爲不祥以賜虞人馬仲尼觀之曰麟也然後取之夫麟鳳五靈王之嘉瑞也今麟出非其時虛其應而失其歸此聖人所以爲感也絕筆於獲麟之一句者所感而起因所以爲終也今註經既終乃下明詔將以宣行聖作博問羣賢絕筆之義雖同非因感歎之事是表聖德謙讓問于王公卿佐速於道釋二宗旁求辨博之才更俟發明之理也

詔曰有能起予類於卜商鍼疾同於左氏渴於納善朕所虛懷苟副斯言必加厚賞

義云卜商字子夏孔子弟子也論語八佾篇云子夏問於夫子曰巧笑倩兮美目盼兮素以爲絢兮何謂也子曰繪事後素子夏曰禮後乎諸家所註云此詩上二句在衛風碩人之二章閔莊姜之詩也其下一句逸也比喻莊姜有盼倩之色而能以禮

白持喻如繪畫締繡先以五彩分布廢映成文然後以白色分別其間乃能一一彰顯分明也夫締刺之成文爲繡畫之成文爲繪此夫子喜子夏開繪事後素之言即知以盼倩美色須以禮自持故云禮後手

夫子乃曰起予者商也始可與言詩已矣蓋喜卜商明了夫子言詩之意故云能起發我言詩之旨也左氏者左丘明也夫子著春秋丘明傳之經有所誤則丘明正之或先經以始事或後經以終義春秋之得丘明若良醫之鍼疾矣聖旨延行羣才共暢玄理若仲尼之於子夏春秋之俟丘明不拒直言唯在進善以虛懷後望以厚賞訪求明聖情採納之至也賞以勸善亦以報功也

詔曰且如設臣自聖幸非此流

義云設臣自聖者尚書同命篇云僕臣設厥后自聖是也賢良在用固無使佞之臣英敏垂乾豈有自聖之失誠非此流也

詔曰懸市相矜亦云小道既其不諱咸可直

言

義云懸市相矜者昔呂不韋為秦丞相封萬戶侯威望之威冠於海內聚賢者著書書成懸於市曰有增減一字者賞千金號曰呂氏春秋大誇於時今聖旨註述既成下訪才彥開直言之路垂不諱之恩則懸市矜誇誠為小道矣不韋後得罪始皇竄之於蜀也

詔曰勿為來者所嗤以重朕之不德

義云不德者謂失無為之德也玄經與旨演暢既周再垂博採之言乃下獎延之詔則九圍之外八極之中孰不仰感聖明朝宗至道矣暨明年乃御書四石幢註經立於左街與唐觀右街金仙觀又諸州節度使刺史各於龍興觀開元觀形勝之所各立石臺以傳不朽又尋御製此疏宣布寰瀛勅曰道德五千實惟家教理國則致乎平泰修身則契乎長生包萬法以無倫冠六經而首出宜昇道德經居九經之首在周易之上以道德周易莊子為三玄之學

仍以莊子為南華真經文字為通玄真經列子為沖虛真經庚桑子為洞靈真經准明經例赴舉其老君傳內析出轉非不令同傳

上來述製疏之由已竟向下入解正文於中大分為二一者先解疏題二者入文科判今初也先解疏題曰

老子道德經疏者疏題即經題也向下當辨所言疏者疏決開通之義也謂經合衆義玄妙幽深難詮註已終而文義未盡故述此疏開通幽蹟疏決玄微分釋意義今可會入故謂之疏亦云疏者條也條理經義令人易曉或云鈔鈔以抄集為名或云記記以紀錄為目此蓋隨時立名皆是包括義理之義也疏釋題訓者釋以銷解為義言將疏決經文先當銷解經目題者訓視之首凡經籍記傳史策篇章先標首目視之可會總以此義名之曰題即標舉綱領之意也訓者教言也隨文訓解之義謂六書不同也大凡文字之與雲篆初擬傳於天上倉頡象跡與於人間大體

有六一謂象形日月字是也二謂指事上下字是也三謂假借行雖字是也四謂形聲江河字是也五謂會意止戈為武人言為信反正為乏是也六謂轉注考老左右字是也製文字六意不同形聲假借轉注等意以成文字須以訓之乃明其義理爾雅有釋訓毛詩有詁訓即其類也

疏御製者向來已明所作疏文明御製述作之聖即謂玄宗皇帝也乃太上老君三十六代孫睿宗第三子大唐之第六帝也龍文表聖曰角標奇叶太平之符應壬辰之運母曰昭成順聖太后實氏以則天垂拱元年乙酉八月五日戊戌生於東都生而聰明睿哲及長寬仁孝友好學善屬文英武果斷尤工楷隸兼善騎射三年閏月丁卯封楚王天授二年十月戊戌出閣開府置官屬長壽二年封臨淄王居於興慶里景龍二年出為潞州別駕是時州境日抱戴月重輪逐鹿渡河赤龍據按嘉禾合穗黃龍乘城仙洞自開重誦累應黃龍再見赤經騰波李樹連理神著翹立

寢堂瑞氣壺口紫氣伏龍疑山巨人留迹夏禹表氣聖人金橋及神人傳慶凡一十九瑞編於史策唐隆元年入誅韋后平內難迎睿宗即位至開元元年自相國平王登極在位四十四年天寶十四年傳位皇太子寶應元年壬寅崩年七十八歲御者臨制之稱如御寓御天義也製者作造之謂如制禮作樂之言也

上來釋疏題已竟次入正文將釋下文約疏大料二段一曰總標宗意二曰闡章釋文總標中又分為二者所詮之法即指道德二字也二者能詮之教即經之一字也解釋具在向下經題中當辨夫此道德二字者宣道德生畜之源經國理身之妙莫不盡此也昔葛玄仙公謂吳王孫權曰道德經者乃天地之至妙有天道焉有人道焉有神道焉大無不包細無不入宜遵之焉就此門中大略宗意有三十八別

第一教以無為理國經云絕聖棄智人利百倍絕仁棄義人復孝慈絕巧棄利盜賊無

有又云愛人理國能無為乎又云我無為而人自化

第二教以修道於天下經云修之於天下其德乃普又云執古之道以御今之有又云執大象天下往

第三教以道理國經云以道莅天下其鬼不神非其鬼不神其神不傷人又云天下無道戎馬生於郊

第四教以無事法天經云人法地地法天又云道常無為而無不為侯王若能守萬物將自化

第五教不以尊高輕天下經云貴以身為天下若可寄天下愛以身為天下若可託天下又云奈何萬乘之主而以身輕天下輕則失臣躁則失君又云聖人不為大故能成其大

第六教不尚賢不貴實經云不尚賢使人不爭不貴難得之貨使人不為盜又云欲不欲不貴難得之貨

第七教化人以無事無欲經云常使人無知

無欲使夫知者不敢為也為無為則無不理矣又云我無事而人自富我無欲而人自樸又云不欲以靜天下將自正

第八教以等觀庶物不滯功名經云天地不仁以萬物為芻狗聖人不仁以百姓為芻狗又云行不言之教又云為而不恃功成不處

第九教以無執無滯經云為者敗之執者失之又云去甚去奢去泰又云聖人無常心以百姓心為心

第十教以謙下為基經云貴以賤為本高以下為基又云江海所以能為百谷王者以其善下之又云受國之垢是謂社稷主受國不祥是為天下王又云大國宜為下又云善用人為下又云大國以下小國則取小國以上皆本天子而言

第十一教諸侯以正理國經云以正理國又云以智理國國之賊不以智理國國之禍又云民之難理以其智多是以難理

第十二教諸侯政無苛暴經云理大國若烹

1872

小鮮又云朝甚除田甚蕪倉甚虛又云其政察察其民缺缺

第十三教諸侯以道佐天子不尚武功經云

以道佐人主不以兵強天下又云兵強則不勝又云善勝敵不爭又云雖有甲兵無

所陳之使人復結繩而用之又云兵者不祥之器不得已而用之又云勝而不美

第十四教諸侯使守道化人經云古之善為士者微妙玄通又云其政悶悶其民淳淳

第十五教諸侯不翫兵黷武經云用兵有言吾不教為主而為客不敢進寸而退尺又

云抗兵相加哀者勝又云禍莫大於輕敵又云善為士不武又云攘無臂執無兵又云不爭之德

第十六教諸侯不尚淫奢輕徭薄賦以養於人經云民之飢以其上食稅之多是以此飢又云人多伎巧奇物滋起

第十七教諸侯權器不可以示人經云魚不可脫於泉國有利器不可以示人又云古之善為道者非以明民將以愚之

第十八教以理國修身尊行三寶經云我有三寶保而持之一曰慈二曰儉三曰不敢為天下先

第十九教人修身曲己則全守柔則勝經云曲則全又云柔勝剛弱勝強又云柔弱勝

剛強又云柔弱者生之徒剛強者死之徒又云強梁者不得其死

第二十教人理身無為無欲經云常無欲觀其妙又云不見可欲使心不亂

第二十一教人理身保道養氣以全其生經云致虛極守靜篤又云專氣致柔又云為腹不為目去彼取此又云知其白守其黑

又云知其子守其母又云我獨異於人而貴求於食母又云綿綿常存用之不勤

第二十二教人理身崇善去惡經云天下皆知美之為美斯惡已皆知善之為善斯不善已又云常善救人故無棄人常善救物故無棄物又云善人不善人之師又云挫其銳解其紛又云上善若水

第二十三教人理身積德為本經云舍德之

厚又云上德若谷又云大丈夫處其厚不處其薄居其實不居其華又云君子終日行不離輜重

第二十四教人理身勤志於道經云上士聞道勤而行之又云勇於不敢則活

第二十五教人理身忘棄功名不耽俗學經云絕學無憂又云功成名遂身退又云成

功不居又云為道日損又云名與身孰親孰多得與亡孰病又云甚愛必大費多藏

必厚亡又云難得之貨令人行妨

第二十七教人理身外絕浮競不銜已能經云不自見故明不自伐故有功不自矜故長又云大辯若訥大巧若拙又云廣德若不足又云大音希聲又云自知者明自勝

者強

第二十八教人理身不務榮寵經云寵辱若驚又云富貴而驕自遺其咎又云持而盈之不知其已揣而銳之不可長保

第二十九教人理身寡知慎言經云知不知

上不知知病又云多言數窮不如守中又云輕諾必寡信多易必多難又云塞其兌閉其門終身不勤

第三十教出家之人道與俗反經云俗人昭我獨若昏俗人察察我獨悶悶又云明

道若昧進道若退

第三十一教人出家養神則不死經云谷神不死是謂玄牝又云深根固蒂長生久視之道又云善建不拔善抱不脫

第三十二教人體命善壽不亡經云死而不亡者壽

第三十三教人修身外身而無為經云後其身而身先外其身而身存

第三十四教人理心虛心而會道經云虛其心弱其志

第三十五教人處世和光於物經云和其光同其塵又云大道汎兮其可左右又云被褐懷玉

第三十六教人理身絕除嗜欲畏慎謙光經云五色令人目盲五音令人耳聾五味令

人口爽馳騁吹獵令人心發狂又云民不畏威則大威至

第三十七教人哀多益寡經云以有餘奉不足又云既以與人已愈有既以與人已愈多

第三十八教人體道修身必獲其報經云陸行不遇兕虎入軍不被甲兵又云以其無死地

舉此三十八別以明經之大意所詮之法然則此經大則包羅無外細則入於毫間豈止三十八門便盡其要為存教義汎舉大綱比

之秋毫萬分未得其一也禮記云道也者不可須臾離可離非道也若為君之無道德如

瞻視之無兩目若為臣之無道德如胃腹之無五藏理家之無道德如尸殭而無氣由是

論之道之於人不可闕矣其若離言教絕指陳玄之又玄妙之又妙斯可以神照不可以言傳道之極矣
上來總標已竟向下開章釋文
道德真經廣聖義卷之一

道德真經廣聖義卷之二

唐廣成先生杜光庭述

釋老君事跡氏族降生年代

疏老子者太上玄元皇帝之內號也義曰前明所說之教次釋能說聖人能說聖人所謂老子者即太上老君也太上謂證果尊位玄元皇帝謂顯冊鴻名內號謂真經共所標載今就老君位號之中分為三十段以解名號之由起也

第一起無始者所言老君也老君生於無始起於無因為萬道之先元氣之祖也無光

無象無音無聲無色無緒幽冥冥其中有精其精甚真彌綸無外故稱大道大道之身即老君也萬化之父母自然之極尊也

第二體自然者大道元氣造化自然強為之容即老君也虛無為體自然為性莫能使之然莫能使之不然不知其所以然不知

其所以不然故曰自然而然焉玄仙公存訣云老子體自然而然生乎太無之先起